



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA
GRADONAČELNIK

P R A V I L N I K

**O RASPODJELI NOVČANIH SREDSTAVA ZA SUFINANSIRANJE
TROŠKOVA PRUŽANJA USLUGA VANTJELESNE OPLODNJE**

maj, 2021. godine

Na osnovu člana 15. Zakon o principima lokalne samouprave u Federaciji Bosne i Hercegovine („Službene novine Federacije BiH“ broj 49/06 i 51/09), člana 34. i 117. Statuta Grada Zenica („Službene novine Grada Zenica“ broj: 5/15), a u vezi sa Zaključkom Gradskog vijeća broj: 01-01-18690/17 od 02.11.2017. godine, Gradonačelnik donosi

P R A V I L N I K

O RASPODJELI NOVČANIH SREDSTAVA ZA SUFINANSIRANJE TROŠKOVA ZA PRUŽANJE USLUGA VANTJELESNE OPLODNJE

Član 1.

Ovim Pravilnikom uređuju se uslovi, visina pomoći i način ostvarivanja prava na dodjelu jednokratne novčane pomoći za sufinansiranje troškova pružanja medicinskih usluga vantjelesne oplodnje (u daljem tekstu: jednokratna pomoć), ženama koje su u bračnoj ili vanbračnoj zajednici sa područja Grada Zenica.

Član 2.

Zbog teške ekonomske situacije i pada nataliteta posljednjih godina u BiH, cilj Grada Zenica je da, na osnovu Pravilnika, poduzimanjem proaktivnih mjera razvija strategiju stimulisanja žena na rađanje i stvara optimalne uslove za podizanje nataliteta u našem društvu.

Član 3.

Sredstva za ovu namjenu utvrđena na poziciji budžeta Grada Zenica - Transferi pojedincima (gradska kuhinja, alternativni smještaj, pomoć za liječenje teško oboljelih osoba i djece, vantjelesna oplodnja, boravak djece u predškolskim ustanovama, školovanje, Medica i dr.), raspoređuje Gradonačelnik zaključkom na prijedlog Službe za boračko-invalidsku i socijalnu zaštitu, stambene poslove i društvene djelatnosti (u daljem tekstu: Služba) u skladu sa utvrđenim kriterijima, raspisanim pozivom i na osnovu zahtjeva podnesenih na protokol Grada Zenica (u daljem tekstu: Grad).

Član 4.

Kriteriji za ostvarivanje prava na jednokratnu pomoć iz člana 1. ovog Pravilnika su:

1. Da je žena koja podnosi zahtjev u bračnoj ili vanbračnoj zajednici i da je brak postojao prije početka postupka vantjelesne oplodnje a vanbračna zajednica da traje najmanje tri godine prije početka postupka vantjelesne oplodnje;
2. Da oba partnera u vanbračnoj zajednici imaju prebivalište na istoj adresi na području grada Zenica najmanje 3 (tri) godine prije podnošenja zahtjeva za ostvarivanje prava;
3. Da oba partnera u bračnoj zajednici imaju prebivalište na području grada Zenica prije podnošenja zahtjeva, a jedan bračni drug da ima najmanje 3 (tri) godine prebivalište na području grada Zenica prije podnošenja zahtjeva za ostvarivanje prava;
4. Da žena može roditi dijete samo u postupku vantjelesne oplodnje;
5. Da žena nema više od 45 godina života.

Član 5.

(1) Pravo na jednokratnu pomoć može ostvariti žena koja ispunjava kriterije iz člana 4. ovog Pravilnika za maksimalno tri pokušaja, na način da će Grad sufinansirati troškove postupka vantjelesne oplodnje za prvi pokušaj u maksimalnom iznosu do 1.000,00 KM a za drugi i treći pokušaj u maksimalnom iznosu do 2.000,00 KM.

(2) Izuzetno od odredaba prethodnog stava žene koje su imale više od tri pokušaja a nisu koristile sredstva putem Službe na način iz stava (1) ovog člana mogu ostvariti pravo na sufinansiranje troškova vantjelesne oplodnje za najviše dva pokušaja za koja podnesu zahtjev Službi u iznosu od po 2.500,00 KM za jedan pokušaj.

Član 6.

(1) Pravo na jednokratnu pomoć utvrđuje se rješenjem.

(2) Iznos sredstava utvrdit će se Zaključkom Gradonačelnika na prijedlog resorne Službe.

(3) Isplata sredstava vrši se na račun podnosioca zahtjeva.

(4) Po završetku provedenog postupka vantjelesne oplodnje korisnice prava su dužne u roku od mjesec dana dostaviti dokaz (račun i sl.) o namjenski utrošenim sredstvima dodijeljenim od strane Grada.

Član 7.

Žene koje ispunjavaju kriterije za ostvarivanje prava iz ovog Pravilnika prilikom podnošenja zahtjeva na propisanom obrascu za ostvarivanje prava, osim vjenčanog lista koji će biti pribavljen po službenoj dužnosti, dužne su dostaviti i sljedeću dokumentaciju:

- Dokaz o prebivalištu za oba partnera;
- Ovjerena Izjava za onog partnera u bračnoj zajednici za kojeg se dokazuje prebivalište na području grada Zenica duže od tri godine prije podnošenja zahtjeva za ostvarivanje prava ili Ovjerena Izjava oba partnera u vanbračnoj zajednici da imaju prebivalište na području grada Zenica tri godine prije podnošenja zahtjeva za ostvarivanje prava;
- U slučaju postojanja vanbračne zajednice - ovjerena izjava za oba partnera data pod punom materijalnom i krivičnom odgovornošću o postojanju vanbračne zajednice u smislu odredbe člana 3. Porodičnog zakona FBiH;
- Nalaz i dokaz za liječenje neplodnosti metodama vantjelesne oplodnje izdat od nadležne ginekološko – akušerske klinike ili specijaliste ginekologije koji se bave humanom reprodukcijom u javnoj ili privatnoj zdravstvenoj zaštiti žene;
- Predračun ili račun troškova postupka vantjelesne oplodnje izdat od strane zdravstvene ustanove koja provodi tu uslugu;
- Potvrda o otvorenom tekućem računu podnosioca zahtjeva.

Član 8.

Ukoliko podnosilac zahtjeva namjenski ne iskoristi sredstva uplaćena od strane Grada za sufinansiranje pokušaja vantjelesne oplodnje dužna je ta sredstva vratiti na depozitni račun Grada Zenica, broj: 141-355-53200161-07 otvoren kod BBI banke d.d. Sarajevo, vrsta prihoda: 723139, šifra općine: 103.

Član 9.

Novčana pomoć će se dodjeljivati na osnovu podnesenog zahtjeva na objavljeni poziv po redoslijedu primljenih zahtjeva a do utroška obezbijedenih sredstava Budžetom za tekuću godinu.

Član 10.

U postupku realizacije ovog Pravilnika štitiće se privatnost i dostojanstvo osoba koje se od neplodnosti liječe vantjelesnom oplodnjom, te se neće javno iznositi imena i drugi lični podaci ovih osoba.

Član 11.

Ovaj Pravilnik stupa na snagu narednog dana od dana objavljivanja na oglasnoj ploči Grada. Stupanjem na snagu ovog Pravilnika prestaje da važi Pravilnik o raspodjeli novčanih sredstava za sufinansiranje troškova vantjelesne oplodnje broj: 02-45-14847/20 od 27.07.2020. godine.

Broj:02-31-8320/21
Zenica,04.05.2021.godine

